

鹿
裴
石
室
集

鹿裘石室集卷第十五

宣城梅鼎祚禹金著

詩

七言律

雜興八首

淮甸龍興統百靈
手提三尺掃羶腥
再開渾沌扶天地
獨運經綸偃日星
玉帛萬方歸禹貢
臯夔千古集虞廷
小臣尚有攀髯淚
冠劍橋陵氣
宵冥

其二

文皇六駕起燕中周鼎千年卜鎬豐竝建陪京
高王氣三驅大漠闢華風黃龍紀運新儀制白
虎譚經決異同叩馬孤臣今特祀天恩當日念
遺忠

其三

裕陵松柏轉蕭然故老猶傳土木年龍戰偶當
逢百六虎賁空說擁三千廟謨豈爲金縢誤天
意終畱玉輦還獨灑孤忠司馬淚功臣多少畫

凌煙

其四

孝皇功德繼唐堯當代君臣際聖朝萬戶歌謠
天浩蕩千官環珮日逍遙露臺歲入兼猶惜霜
簡時清轉見饒一閉玉門辭外質九關秋色自
蕭蕭

其五

天授雄才漢武皇誇胡羽獵校長楊自斑倩女
金條脫別號將軍鐵襴襦北狩鑾輿回朔氣南

巡花月扈春陽先朝帝澤原優渥萬歲千秋樂
未央

其六

漢家八葉挺神孫穆穆虞風闢四門萬里蒲梢
來大宛千年桃實獻崑崙真人絳節稱僊從上
將金貂荷主恩幾務轉勞諸相國紫微高拱玉
皇尊

其七

中興漢德頌嵬嵬坐見呼韓款塞來太社撝金

俘早獻離宮列宴帝親陪時平自絀犁庭議虜
在終思度漠才帷幄運籌關至計却從中夜望
三台

其八

詞客翩翩集漢京于時何李抗前旌鼎新一代
文明運嶽立千秋述作名處處投珠堪照乘人
人懷璧總連城尚畱河洛精靈在先後吾曹奉
主盟

答沈山人仕再見寄

三載相思未報書流澌又下越江魚賦傳沈約
郊居後家本秦川喪亂餘老去故人天上少病
來華髮鏡中疎自耽春色西湖好不道何門可
曳裾

寄朱比部

菊花秋老一逢君忽漫榴枝照夕曛舊約轉懷
鍾阜雨孤唵遙隔宛谿雲聚萍歲月看鴻跡倚
杖行藏混鹿羣已自玄心甘寂莫 廟堂休薦
倡雄文

寄君典大來

把酒還停一浩歌敬亭山色鬱嵯峨門閒落葉
秋長積溪冷微風晚自波彩筆中宵知並夢黃
壚何處好同過眼前未可無君輩不是生平別
緒多

舟過峽石盤龍山呈惟肖

楚江雙棹萬楓寒落日天高雁影殘峽石凌波
疑虎渡敬亭圍翠學龍盤山川自妬人情換歲
月深諳世路難豈有如君終不達好彈伊祖漢

時冠

荅任光祿人日見寄附訊胡山人

東風先入柳條新
翠拂東華綺陌塵
鳴珮金門星隱歲
散花綵筆日當人
楚江雲濕寒吞雪
吳樹烟晴暖駐春
聳衛故交畱署邸
好傳三賦振楓宸

望雪樓上見梅花憶王仲房客游

匝地寒雲黯未收
千峰雪色晚明樓
蒼茫獸立久無語
徙倚孤懷不耐愁
郢里憑誰供和曲
剡

溪有客待乘舟鴻泥距跡知何定欲折梅花憶
隴頭

夜成

自是明時一野夫十年姓字浪稱儒掌中今古
千巡酒袖裡烟霞五嶽圖玩世逢人從應馬愁
心斫地欲歌烏生來雙眼難回白矯首青天月
色孤

立春日歸蒲上

鏡裏流光逝水頻歲華又逐物情新卽餘陰斫

寒生雪已有晴雲早赴春曲浦茅堂先世業隔
年杯酒舊家人橋西柳色青初動坐見絲絲綰
醉巾

寄華廣文明伯陪都

鍾陵紫氣望中嘉不厭青瑣度歲華久向西曹
聞結社近從北海識通家試泉寒憶梁溪棹點
筆春嬌上苑花曾爲加餐遙寄訊驪珠字字照
飛霞

過王氏畱飲

小姬沽酒自留賓一笑春回百媚新
傍水寒光遙逼座開簾明月漸窺人
天生尤物供狂興地轉江城侶洛濱
但使與卿長日醉不愁飄泊在風塵

漫成

酣歌長憶楚醒人無數春風碧艸新
今古世情元鹵莽乾坤吾道豈沉淪
鳳皇臺迥頻愁眼鸚鵡材高轉累身
回首十年成底事滄江何處問垂綸

張幼于伯仲書至

吳江風冷暮潮生迢遞雙魚此問盟斗下雌雄
勞望氣河東兄弟舊知名投珠忽掩三秋色抱
璞俱縣萬古情近報草玄堪擬易豈緣詞賦重
西京

王大維建偕張五枉過投什

寒日空林積雨開雙車凌曉度崔嵬龍愁劍影
分珠水鳳引簫聲合玉臺春逗梅花衝雪放暮
看山色逐雲來與君同是高陽侶千載風流濁

酒杯

暮秋小雨浹旬捷關偃臥詠懷

楊柳蕭疎南陌頭經旬閉戶不知愁林深返照
寒迷雨徑曲幽花晚戀秋耽寂化機叅夢蝶卜
遊天氣試鳴鳩白雲如水悠然臥吾自風流擅
一丘

畱都秋夕示沈君典兼呈部寺諸公

握手相看意氣生青楓蕭颯石頭城長遊君好
邀禽慶多病余真類馬卿淮水月明歌玉樹漢

宮秋冷望金莖遙知侍從多仙侶載筆何當賦
兩京

莫雲卿輩集太常許公宅因過天界聽講
拂衣中歲賦歸田愛客頻開玳瑁筵偶值太常
齋罷日初看小陸洛遊年城南韋杜天原近戶
外煙霞地自偏都講向來君獨領却從醉裏學
逃禪

晚秋同張山人訪姚大名敘卿姚時聽徙
漢郡由來左輔尊縱令薄譴亦君恩酣歌且

住爰絲里交態休書翟尉門白鷺江聲寒入郭
盧龍秋色晚開樽只今二仲堪來往況復蓬蒿
舊徑存

登燕子磯

片石岩巖破浪開楚天蕭瑟氣悲哉凌風睥睨
千巖動落日帆檣萬里來秋冷蟄龍尊窟宅江
空靈蜃結樓臺虹橋百尺馮闌外直取寒杓作
酒杯

秋夜陳比部署中有懷故園

僊郎畫省 帝城西苑柳宮槐接大隄月滿千
門寒度鴈風迴雙闕曙鳴雞夢中秋漏驚初永
醉後鄉書懶更題遙指石頭雲片片茅堂只隔
宛陵溪

寄汪仲嘉象先叔姪

登樓秋杪思漫漫六六芙蓉掌上看明月兩鄉
愁對酒故人千里問加餐雌雄南斗龍光合今
古澄江練影寒不是嵇生曾任達許誰能奉竹
林驩

李子省司訓歸滁陽贈之

謝李遺踪羨壯游
離心天畔逐歸舟
雙溪雨霽霞盤水
疊嶂雲寒雁度樓
賦就聞居華映日
吟憐幽澗艸知穠
鱸魚政美堪供饌
鱣幄遙生苜蓿愁

送崔大下廣陵謁故相李公

錦帆八月挂秋濤
知落揚州第幾橋
廢苑螢流蕪自照
御隄鶯罷柳全凋
愁邊白雪才人老
望裏青雲相府遙
花石平泉春爛熳
風流誰似李

文饒

唐丈人守雷陽入覲暫還里居

西南萬里壯君游多難譚兵半白頭大將戈船
齊下瀨炎方冠帶襲中州三年夢寐逢今雨五
嶺烽煙接素秋 聖主春來徵渤海遙知陳對
漢廷優

奉寄少宗伯上海董公

引裾道重南荒戍摺笏名高北斗班忽買青山
臨大海遙瞻紫氣出函關江南鱸美秋風起天

外鴻冥日月閒誰識董生憂國意尚畱遺策在
人間

天逸閣成奉家大夫起居

平楚蒼然接敬亭
岧嶢飛閣插空青
天低日月秋吞吐
地迴風煙晝窅冥
遂有清尊開萬象
直教綵筆役羣靈
縣知未老先能逸
幾載江湖動客星

其二

謝公樓畔少城隅
複道行空結構殊
呼吸似能

通帝座往來真可接天都千年隱市傳僊尉一
賦登高見大夫更道子雲耽寂寞近將玄草命
童烏

其三

棟宇高寒破沈寥星辰曉夜自相朝誰携太乙
青藜杖我弄仙人紫玉簫望極雙溪澄練影坐
來千嶂起霞標卽看羽翼生能就黃鵠摩天不
可招

其四

丈人安在上頭居十二雕闌綴綺疏月滿南樓
供理詠天垂東壁掌圖書爲郎司馬游方倦應
客元龍傲未除紫氣尚畱雙劍在臨高時逼斗
牛墟

春夜同王九江宴邵明府涇川城樓因談
蔡子木司空皇甫子安兄弟

五城遙削五雲屏良夜芳尊醉不醒敢謂名家
眉擅白終慚傲吏眼能青天邊鳬舄多仙氣江
上羊裘應客星一賦登樓才自老鄴中諸子盡

飄零

春日劉翁明府麻得之吳廷承沈君典子
登兄載酒登天逸閣得泥字

乘春載酒共攀躋坐俯蒼然萬木齊曲曲嵐光
迴粉堞層層雲氣度丹梯尊前說劍寒星動花
外徵歌夜月迷自是習家風景異恠來諸客醉
如泥

君典就天逸閣觴余有賦

十千斗酒一登樓眼底青山片片浮殘日蒼黃

斜弄雨亂雲蕭瑟暗驚秋主賓在座成雙美今
昔憑高失九愁世事悠悠何足問與君同作醉
鄉遊

寄渝州朱使君

巴江楊柳幾回青行部遙知五馬停三殿省郎
推起草十年門客感飄萍岷峨殘雪來春水牛
斗高天隔曉星憶昔與君稱合調竹枝今好不
同聽

集汪仲嘉謝少廉文昌臺

經年臥病楚江濱此日登臺強對君檻外禽聲
交夏木尊前山色換春雲浮煙萬井孤城遶落
照雙流匹練分但有濁醪須共醉敬亭回首憶
離羣

送程山人遊楚中

程能
書

風烟吳楚隔江流兩岸青山江上浮雲夢高秋
誇賦獵武昌明月共登樓渚蘭芳歇波臣泣瑤
瑟天清帝女游懷古知君頻買醉好將黃鶴酒
家留

大人用韻示元旦詩疊獻

先朝曾侍 御顏頻皓首三逢寶曆新花外鳴
珂初破曉柳邊歸騎乍明春
揭來浮海非違主至竟看山合有人
籃輦可扶歌可和東風不負白綸巾

次峽山

楚江迢遞淨無烟倚醉高歌興渺然
十載雄心孤劒在千峰秋色片帆懸
馬蹄已覺浮生妄牛角空勞白石傳
肯爲時名輕素業海鷗遮莫舊

磯前

月夜張王二子載過

握手重看氣轉豪
千門月色戀綈袍
臨池雲散狂揮艸
倚檻星寒醉解刀
世上名偏憎傲客
杯中物自識吾曹
梁園不是曾同調
寡和逾驚白雪高

張吉父將左希道沈士弘過集

隔年尊酒莽相呼
河朔風流興不孤
况有休文能入詠
且因皇甫重三都
愁來黯淡綈袍色
醉

裏崢嶸筆陣圖千載寥寥君自見斯人何意出
菰蘆

閣夜同袁汝鳴飲

對客清風起竹林憑高陡覺氣蕭森白雲拂檻
閒行酒明月窺人漸滿襟座轉星河疲夜色天
銜樓閣駐秋陰莫輕三徑蓬蒿甚不是求羊未
許尋

大人以聞兩臺刻刻詩示訓步呈見懷

江上青山背郭居愛看春色散郊墟黑頭抱病

昔名拙白眼逢人禮法疎
薊北風煙愁不斷淮南蘿
桂興何如漫憐玉樹當庭
立猶媿無能讀父書

寄報天錫

楚天搖落氣悲哉雁影遙
含尺素來明月隔江愁聽
笛春風滿座憶銜杯餐霞
久已徵仙骨飛雪今堪見
賦才爾輩插萸知盡興好
畱黃菊待余開

八從父誕日集于野堂

鹿門棲隱謝風塵秋滿閒庭桂樹新
缶擊秦聲堪勞歲尊開萊綵倍生春
懷仙五嶽懸藜杖樂聖千秋仗葛巾
况有掌珠雙照乘祇今星聚不誇陳

聞龍郡丞行邑中刻余博士家文輒有陳
報

青袍一誤到于今何物浮名中
客深敢望連城高片玉虛傳敝帚
享千金長風暫息垂天翼明月空
懸出世心有耳如君真不俗十年
流水托

徽音

九日陳郡公招登翠雲失赴寄呈二晉

坐見甘棠誦已成雁堂秋色引雙旌郡中集客
星文聚天外澄波練影清黃菊自供陶栗里青
山還屬謝宣城孤雲衆鳥俱無恙千載猶高下
楊名

其二

江城一眺思悠哉不數當年戲馬臺敢借風流
誇落帽遙瞻雲氣憶嚙杯芙蓉雙塔浮空出齒

舊千峰對鏡開
恠底賦成難和客
登高元說大
夫才

九日前萬伯武歸自白嶽爲陳休寧德基
致聲

憶爾停雲賦
欲裁相逢籬菊又
花開攬衣忽見
青霞起策杖云從白嶽回
地主已聞能下榻
山靈猶喜待銜杯
登高何處饒秋色
五老蒼蒼望裏來

保豐臺同歌者張清

高臺閒眺酒初醒
面面遙山挂翠屏
我自孤吟招李白
爾將雙調侶秦青
寒雲漠漠圍秋堞
木葉蕭蕭下晚汀
已覺憑闌意無限
何來鳴雁不堪聽

還過玉森園似文脊社諸君

暫駐籃輿舊草堂
儘拚行樂及春陽
臨谿幽竹寒生影
過雨穠花晚遞香
惜借青山供酒盛
閒游白日見羲皇
諸郎向是披裘侶
百畝同耕石室傍

送石別駕罷客還楚

楚江春曉下流澌何處孤帆歸去遲
身外浮雲翻自笑握中明月轉堪疑
蘭茝舊誦三閭賦松菊猶存五柳辭
共惜使君公輔器佩刀虛負昔人期

答蹇汝上使君畱別

初以曹郎
謫丞皖

行吟顛顚久湘濱握手新知意轉親
猶憶馬曹容傲吏誰憐魚服作波臣
中宵神劒頻占氣何處仙槎好問津
送子前程須努力清時那得愛

閒身

青山尋李白墓

謝眺青山舊宅畱兼聞李白有菟裘多年松檟
凋零盡異代文章氣味投斜日尚回丘壠照浮
雲不散古今愁前途更問騎鯨處帆落天門萬
頃秋

金陵同殷無美諸君集趙四館

時予將南還

帝城南陌動歌鐘裘馬翩翩俠少逢再得佳人
猶字燕相携詞客總雕龍曲中玉樹依淮水夢

裏朝雲散楚峰明日片帆江路永臨流歡自采
芙蓉

秋日宿通靈峰

白日翩翩振羽翰長虹雙挂碧闌干榻依河漢
繁星曙門掩杉松宿雨寒返照倒銜吳岫出飛
流斜界楚雲殘清秋瑤草如堪拾此地吾將老
鵷冠

南還有感奉寄張光祿諸公

十年行路轉多艱落落風塵損壯顏牛下悲歌

傳白石鴻邊離夢隔青山溪秋帶郭江如練靜
夜當樓月似環先達虛勞時引薦帝鄉翹首
五雲間

秋詠

石門生計戀烟蘿海國風高起夕波傍斗吹笙
流寶月倚欄呼酒倒銀河霜清楚甸蒼梧冷秋
到吳江白鴈多直恐魚龍眠不定中宵愁度九
神歌

過永慶寺

寺近秋齋路不迷
曉鐘頻度石橋西
水清蓮鉢窺龍影
雨積檉林散虎蹄
狎鳥穿厨分佛供
閒雲畱榻伴僧棲
亭亭翠栢強千尺
今古游人幾杖藜

送郡太守陳公入

覲

公先由戶部郎出

敬亭天半削芙蓉
謝朓樓開紫翠重
南國孤城曾下鳳
東方千騎總如龍
一麾久隔西山笏
十載還聽長樂鐘
見說計臣俱賜覲
知君燕對獨從容

早春得朱渝州去秋書時方上計

清秋萬里一書還
二月垂楊漸可攀
北極占星來益部
西牕聽雨夢巴山
塞帷日下黃金詔
執玉天回紫殿班
高第已看經術起
更傳春雪滿燕關

答歐楨伯都下

天北浮雲首重回
登高轉憶大夫才
斗間清夜雙龍合
雪後黃河一雁來
燕市悲歌傳擊筑
西山爽氣照銜杯
過都空有驂騑在
不信縣金爲

築臺

黃山

中天三十六芙蓉此地軒皇御白龍空裏玉壺
飄欲墮風前珠履躡堪從溫泉尚遣丹砂結秘
檢仍看紫氣封却笑向平婚嫁畢虛從五嶽問
僊蹤

下黃山抵太平訪周子良

太常忠簡公子

斗大孤城萬嶂秋敝車還傍故交投雲霞杖底
來春色風雨尊前起暮愁先世兩朝曾折檻幽

人五月只被裘寢丘何意君王問負郭山田薄
可收

周太常祠拜順之先生

祠爲張中丞
諸公所建

都人伏臘儼趨蹌共識先朝老奉常北極封
章懸白日東方繡斧肅清霜圖書一字神猶王
俎豆千秋道自光江左輜軒相望出采風爭表
鄭公鄉

登白嶽

靈秀東南白嶽偏天門日月迴雙縣插空樓閣

疑浮蜃亭午峰嵐盡吐蓮寒沸瀑聲珠迸雨暖
蒸爐氣翠流烟蒼然五老遙相揖忽訝行吟入
斗邊

白嶽懷陳宰德基

山中瑤草正紛紛獨往那能不憶君此地御風
游碧落于時占氣受玄文春生萬壑驅晴雪天
入千峯起暮雲八百浮羅知領在依然猥鶴自
爲羣

送吳虎臣自畱都還山

五噫歌罷且東還盡說梁鴻出漢關濁世似難
容白眼浮生猶幸得青山夢中芳草心堪折望
裏孤雲鬢欲斑明到定裁招隱賦故園叢桂共
誰攀

江上病起答龍使君

春風花外賦停車一別經秋跡漸疎縱酒半生
狂客態加餐兩字使君書夢中明月空梁滿病
後微霜落木初相望只餘衣帶水可堪眇眇獨
愁予

贈姜明府入覲

僊令雄材謝眺同，敬亭山色轉龍蔥。
釣璜舊襲周家寵，歌雪還誇楚客工。
地迴丹砂占夜氣，花深皂蓋起春風。
卽今報政鳴琴裏，擬奏南薰入漢宮。

其二

一自分符白玉京，何人不識佩刀名。
寒帷靈雨隨車到，扃戶寒星傍座明。
徵異桑林看雉集，游仙葛杖化龍行。
久從東閣稱高第，況亦絃歌似

武城

其三

紫氣爭看擁鸛鷖望中宮闕曉蒼蒼五雲飛舄
雙鳬遠千里乘輶一鶴翔茂宰列名環御座
天王受計敞明堂如君不獨黃金賜定得承恩
侍建章

其四

江上驪歌不可聽高齋曾許坐譚經風吹離思
傳明月日握玄心卧艸亭正爾燕臺求駿骨向

來南國避文星上林華鳥鳴珂早猶憶滄波問
楚醒

得朱比部書知在攝中憶之

雄材元自豫章聞列署風流盡屬君共識龍珠
千北斗早傳雁錦破南雲天低二水迴青影日
落諸陵散紫氛卽有金莖慰消渴漢庭今重子
虛文

訓涇邑邵明府涇有琴溪琴高控鯉之地
千載風光尚水西憑君白雪照新題高秋控鯉

雲閒鳥靜晝鳴琴響雜溪地迴郎官通夕宿陽
迴桃李暎春堤疎狂余自屠沽輩執轡虛勞問
隱栖

贈李明府

有客飄然思不羣望中紫氣日網氲百年興頌
徵棠樹四海甘心御李君插架縹緗三萬軸出
關道德五千文過逢醉尉休相問射虎雄名自
昔聞

張五許一過集

曲苑春風乍拂梅何緣二妙策車來開尊託飲
輕千斛遶樹行吟儘百回仙侶飛霞供服食江
城落日照樓臺乾坤此會知難數愁聽孤笳入
暮催

贈姜明府膺薦

清朝治行雅稱良空谷幽蘭久自芳此日西臺
傳疏艸他年南國頌甘棠美名爭附青雲起彩
筆遙分列宿光退食扳輿花外賦風流誰不羨
河陽

贈王九江維禎先輩

名向中郎識辯河老來日月醉鄉過擲金猶誦
登樓賦擊石難忘伏櫪歌僊骨自同緱嶺鶴彩
毫爭換墨池鵞三槐奕葉知傳世况復龍門著
述多

飲潘子會

古鏡吟來十過秋爾家詞客自名流燕鶯夾座
喧春隊風月朋尊美夜游巧簇五辛剛戴勝回
環六甲又添籌何言千日中山釀手挽郎川注

玉舟

送友人入楚

落日潮生酒盡觴
片帆高並楚雲張
狂搖綵筆題鸚鵡
閑聽銅鞮解鷓鴣
枕幃曉偷巫峽雨
林楓秋染洞庭霜
虎頭癡絕生平事
盤礴看君意轉長

鹿裘石室集卷十五

五

鹿裘石室集卷第十五

終

鹿裘石室集卷第十六

宣城梅鼎祚禹金著

詩

七言律

送李郡丞入獻 萬壽

清秋霞闕聽雲璈久向丹霄識鳳毛
北斗平臨僊掌淨南山遙對御爐高
虹流紫氣明華渚虎拜歡聲動赭袍
豈用瑤池問消息願懷金鏡代靈桃

穉晚行遊郊外

一時砧杵動千村秋意相牽偶出門沙鳥狎人
飛乍止嶺雲欺日吐還吞林光已覺依寒露艸
色猶堪藉晚尊卒歲蓬蒿吾自分但逢清世是
君恩

午日集沈二君典許八彥貞酒家

新蒲瑟瑟逐人芳不負嘉辰藉此觴楚客悲歌
空浩浩湘流終古自湯湯雙鬟豔斂丹葵色一
雨嬌生白苧涼已識獨醒非得計可能長醉玉

臺傍

聞故中丞張公起家南大鴻臚

東山一卧遞寒溫歲晚相看道愈尊懷壁孤臣
元待罪 賜環 明主自垂恩客星永夜縣西
極卿月高秋映白門出處關時真不細中興事
業好誰論

送李廣文遷黃縣

滿座俱含立雪情一官馬首又東行海空樓閣
全疑市秋杪雲霞半入城掌故舊推秦博士譚

天元讓魯諸生杏壇千載風儀在屈指儒林起
大名

聳張鴻臚呂侍太夫人不就

渡江小艸計何如愁絕蒼生竟挂車滄海一星
當帝座青山徧地足吾廬違時天意終難問
垂老皇情未覺疎龍性知君馴不易依然花
外賦閒居

春夜無寐步過玉上人會諸子將酒至

披衣起步興悠然偶憶禪居萬竹邊覓徑疎星

迴夜色到門孤月度春烟凌空飛錫聞清梵破
戒携尊入白蓮自少卽無塵土氣冥心長對佛
燈懸

過陳子野明府逢吳門魏季朗讀比玉集
又隨流水到江東散跡年來類轉蓬閒過陳遵
喜投轄偶逢魏伯受叅同朗風浩蕩凌三島明
月高寒浸萬峰聞奏德星今復聚吾曹不獨賦
能工

過翠雲似同游許八彥貞

能誰獨命山中駕憐爾同茲物外情行傍高林
雙鳥下坐來孤閣片雲生年光暗識丹楓暮笑
語偏從白社清曾是支公舊門客未甘丘壑易
簪纓

酒間似許八彥貞

莫笑家無擔石儲壚頭日日莽相呼已知江夏
憎狂士不分高陽號酒徒任達何人能作頌和
歌得爾未爲孤醉餘雙眼塵中白睥睨長天二
曜徂

齋夜飲許實甫懷及伯氏道甫

怪來相見卽嚙卮戀戀綈袍十載期憐爾尚羈
清漢羽難兄先借上林枝停雲江閣懷人暮聽
雨寒燈醉客遲玄度自今多意興髣髴不受北
風吹

送嚴都諫還北

補袞君看還瑣闥垂綸余自卧滄洲東南竹箭
元高品天漢星槎又壯游新拜御顏班豹尾慣
隨僊仗立螭頭由來風采人爭識疏草曾停路

輦收

送徐司封北還銓部

贈爾寧須金錯刀何人不識鳳皇毛
鳴珂紫氣迴雙闕起艸清名冠六曹
北斗夜寒凌玉掌西山春曉照鸛袍
自憐側望飛揚甚時有燕雲引濁醪

其二

奕世風流迥出羣卽今芳譽欲披雲
趨朝題柱明王寵僦直更衣侍女熏
久識金臺求駿骨近

傳桐澤映星文嵇生疎嬾元成癖啓事無勞
御座聞

春日登響山望鼇峰同汝鳴伯溫

雙流長抱釣臺高指點遺踪久寂寥此日扁舟
携客往當筵絕調向君操雨餘積翠迷春郭天
外寒聲起暮濤手把楊枝對尊酒興來吾欲跨
金鼇

夏日元振兄席陪吳興李山人

江村長夏綠陰遲河朔風流又一時心托渚蘭

分作佩手栽隄柳漸成帷病來綵筆看仍健老去清尊願莫辭爲問白蘋洲上草何如今日謝家池

僉憲左遷

十載天涯一幻身但逢同調轉相親清時亦好爲遷客明月還堪共故人寂莫片心玄草在風塵雙眼綠尊新何緣姓字投君耳誤殺南州榻下陳

其二

謝公樓色夏雲殘把手吾曹意氣看是雪成歌
真寡和有霜度海尚餘寒雙流宛水長開鏡萬
里巴山獨倚欄羈思宦情知不淺一卮新酒爲
君寬

夏夜同史劉二司理集龍郡丞所

尊前月色戀輕袍枉殺燕關說酒豪急雨潛銷
三伏氣綵毫飛挽半江濤虛傳市骨千金重豈
謂連城片玉高避暑向稱河朔會當時或恐讓
吾曹

其二

十載青袍已誤儒，斯人何意出菰蘆。
亦知禮數元相假，自笑疎狂不受呼。
漏促高城分玉魄，星依列座蕩冰壺。
當筵未敢稱詞客，作賦由來頌大夫。

同許彥貞再集王氏

竭來明月自今夕，可怪五更徒復此。
游直以醉鄉銷傲癖，欲令何處覓窮愁。
春陽少女千花妒，子夜長歌萬木秋。
蹤跡且教人側目，它年誰不羨。

風流

留都逢徐別駕以計至

財賦東南擁萬艘向稱轉餉漢功曹實邊久見
屯田廢趨府誰知捧檄勞山抱鍾陵天作闕江
分嶓冢雪爲濤從君公暇登臨處五色携來是
彩毫

奉和龍使君懷湯義叔時義叔在南京

雙眼才堪着使君所思大雅復難羣醉中披髮
曾消暑別後縣心欲化雲鍾阜龍蟠高紫氣謝

樓虹遶散丹紋重來已少當筵客猶藉芳蘭入
夜薰

秋日朱比部諸君集莫愁湖時予東歸渡
江矣比部書來恨坐中少季子漫賦荅
之

湖名南國佳人著秋色西曹長吏看遠泛仙槎
星欲動雄飛綵筆雪生寒書傳舊侶追初賞座
少同聲不盡歡却憶停橈江上夜夢乘明月到
筵端

寄沈君典

風流曾許是吾徒
眼底那能一日無
江上浮雲秋不散
郢中白雪調元孤
空山歲晏堪龍卧
積雨更深聽雁呼
莫爲阮家貧太惜
君來猶得醉茱萸

飲叔度梅下因懷豐干諸君

君家水部擅題梅
依舊寒花照酒杯
寄遠一枝還隔歲
懷鄉十月浪登臺
相看白雪俱工調
未許青雲獨論才
轉覺馮高流恨易
不知何處笛

聲來

壽潘子會時入春三日

紫氣初依斗柄流，真人還住海西頭。
眼看花發三千歲，遙指雲扶十二樓。
雙骨清泠矜嶺鶴，片心寥廓付沙鷗。
笑他巧拙閒評宦，不學河陽鬢易秋。

三月八日

偶因多病卧江天，誰指江亭是草玄。
竹葉亂鳴迴暮雨，柳條弄色起春煙。
登樓萬壑遙飛練，閉

戶三春又上弦莫以愁霖還作賦端居亦自有
清緣

潘藩幕子會見貽謝之

憶余年少髮初垂花底逢君笑舉卮一自江天
分落葉每從夢寐接瓊枝羈栖六翮無由舊珍
重雙魚慰所思見說閒居能作賦潘郎鏡裏未
成絲

寄張侍御

曾擁旌旄居上頭君王南顧已銷憂鵲鳴去

國丹心苦花暝扶輿白髮游共道非熊終入夢
豈知冥鵠竟何求青天夜夜同明月悵望峨眉
萬里秋

其二

帝里初勞典謁通西臺列柏正秋風丁年七子
聞推霸甲帳千兵盡貯胸自分驚人非一鶚偶
承望斗識雙龍恩暉欲報慚無地誰信青衫負
氣雄

寄朱比部蜀郡

猶憐握手 帝城初無那飛蓬跡轉疎粉署名
高淹虎竹錦江濤發憶魚書登樓明月遙縣夢
題扇秋風忽滿裾何必青山吊楊馬古今詞客
更誰如

集時甫叔齋中

憶醉桃花萬樹烟今來忽及歲寒天簾前雨色
搖千嶂座上風流見七賢但得盈尊俱不惡已
知孤調向能傳出門便自憐陳跡吾欲從君甕
下眠

壽九溪伯翁

春到筵前栢酒卮旋裁金勝製新詞珠光夜集
三千履丹氣晴生六一泥桂自五枝移貝闕谿
從九曲轉瑤池看君直是神仙胄招得雲邊舊
鶴騎

過仲父別墅

探幽曾憶去年題只尺桃源路不迷三徑艸香
聯騎入千峰雲霽抱檐低游梁已久知魚樂看
竹于今喜鳳棲有興閒能陪杖屨玉壺清酒約

重携

九日

去年九日謫仙樓曾擬觀濤賦壯游黃菊又看
供勝節白雲長日弄清秋悠然陶令貧能醉枉
殺虞卿老亦愁却憶龍山渾閒事到今人自說
風流

冬夜

永夜風林怒欲號有人青髻倍刁騷浮名江漢
羞蟲臂濟美雲霄遲鳳毛十載閒情甘縱酒中

原病色起觀濤卽教濩落終藏用却笑元龍氣
尚高

送地師楊爾勗歸省閩中

到想家園熟荔枝卻憐分袂早春時長楊隔浦
聽鶯曉細雨穿林度馬遲愛日籃輿花外賦停
雲彩筆夢中詩知君久解青囊術爲卜茅茨傍
武夷

聞學史蒞任有感呈貢東平受軒先生

蕭條三徑省逢迎獨對東風寓遠情
新命倏

頌周柱史薄名猶混魯諸生羊城擬辦青山計
兔苑慚蜚白雪聲岐路蒼茫那自定錦江今政
卧君平

柬沈君典

憶昨垂髫同學日憑君不負白頭盟河清擬遂
彈冠慶樗散空縣隱市情好我祇今堪濁酒誤
人從昔是虛名請橫醉眼看秋色萬里浮雲傍
暮征

送六從兄郡幕如荆

蓮幕真宜吏隱情況逢佳麗古專城星分翼軫
遙連峽江自岷峨曲遶荆夜靜離心縈夢艸風
迴清嘯間啼鷺卽今東閣能延士定識登樓作
賦名

過劉德純敬亭別墅飲次似貢一惟肖

三年前憶共譚經曾許幽懷托敬亭重把一尊
頭未白每臨孤嶂眼能青鳴琴流水元同調鼓
瑟春風尚滿庭君自彈冠追世業移文余爲謝
山靈

敬亭舟中送張大來再之畱都因懷嶺南

何玉登

郭外寒江淨不流
淡雲疎雨送行舟
年華試問雙蓬鬢
客計惟餘一蒯緱
庾嶺梅花思遠道
敬亭楓葉下殘秋
向來遊俠西京地
誰共翩翩過五侯

蕪江贈魏將軍

鳴笳疊鼓大江濱
把酒高歌一對君
自是廉頗稱老將
由來卻縠在中軍
吳組練明秋月
橫

海樓船拂曉雲直待功成辭上賞五湖歸問白
鷗羣

阮鶴臯自廣陵歸同登赭山望大江

逢君秋色倍堪憐灑洒平蕪眺遠天萬疊雪山
翻夕照千門城郭帶寒烟中流帆影尊前落下
界鐘聲杖底縣我亦霍然將起病觀濤何必廣
陵傳

魯幼齊江樓夜集

可令流俗識行藏白眼相看意轉長澤國夜寒

雲似水江樓秋滿月如霜囊中綠綺音誰托句
裏青山色自揚判病與君輸一醉何妨高臥酒
壚傍

秋夜同秀水朱明府集李蕪湖署閣

坐見鳴琴化理成邀賓江閣月華生秋深菊色
寒侵座風起潮聲夜撼城海上神仙初作吏天
涯兄弟舊知名只今瓊樹聊相倚早晚雙鳬入
玉京

答太常少卿嚴丈見寄嚴先守給事中

向傳嚴助對公車侍從承明十載餘一日如泥
齋後酒兩朝諫獵袖中書雪殘遠夢迷鳩鵲歲
暮相思贈鯉魚泰時甘泉聞近領雄文早晚借
吹噓

送唐外舅副察大梁兼呈吳明卿藩叅田
杜二憲伯

玉節親承憲府開嵩陽佳氣望中來吹臺明月
羣僊下汴水清醴匹練迴賦自游梁工絕調人
從歌郢識雄材星文千載看重聚况有鄒枚托

乘陪

除夕自嘲

莫惜張燈勸酒頻，居然雲物望邊新。
寒鍾五夜初辭臘，曉角孤城又散春。
倚劍風塵曾擅俠，投珠江海不逢人。
悔將綠髮閒耽事，一笑尊前倒着巾。

元日大雪紀懷

且畱雙眼向風塵，栢酒辛盤歲事新。
五夜積陰遲啓曙，千門飛雪乍明春。
操權湖海星爲客，握

化雲霄帝有臣黃竹歌應誇
睿藻朝正誰和

郢中人

送姚山人唯之還武林

七十行年鬢未疎
看君湖海意何如
孤鐙細雨淹春酒
遠道嬌花引夕裾
浪跡梁園傳雪賦
倦游漢圃握丹書
錢唐東望晴雲滿
好御長波赤鯉魚

醉後霽望憶南都
許奉常朱比部陳明府

姚使君盛茂才任光祿諸公

延眺高林宿雨開輝輝初日照蒼苔千峰秋色
雲邊落百道泉聲樹杪來紫氣中原遙入望鴻
書南國若爲裁翩然一嘯真何意江漢風流濁
酒杯

雨夜簡叔度

夜雨蕭蕭碎客心遙知君有苦寒吟路岐南北
從飄梗俠氣縱橫耻問金是處佳山堪着眼但
揮流水足知音阿蒙已復非吳下一日登樓意
自深

閣夜集何叔度

敬亭千載鬱崔嵬望裏蒼然落景來
雙劒夜光依斗合一尊寒色倚雲開
相將擊筇增狂態每自登樓見賦才
白眼與君看亦得酒人何必說燕臺

寄張戶曹有光通州

薊門芳艸逗年光近報銜恩出建章
抗論向傳真御史量移猶滯舊曹郎
白雲漢署春無恙落日燕山夢轉長
早晚尚期君入對徵求今已

到江鄉

君典太史移疾南還

蓬萊闕下散仙班
暫許閒身問碧山
一疏主恩真浩蕩
百年吾道屬間關
愁來藥餌供多病
夢裏爐香繞御顏
回首長安鵷侶在
冥冥鴻色未堪攀

廬次書感示君典

扶杖猶存見汝期
王孫芳草得歸遲
逢春雨雪寬衣帶
幾載冰霜戀髻絲
名起雁行看漸失
困

來龍性竟難羈坐中不淺悲歌意舉目山河異
昔時

天逸閣酒間答僉山人

遙空飛閣破冥冥仙籟泠然此共聽中聖牀頭
堪累月少微江左是孤星天垂半壁河流白雨
散高城海氣青一片敬亭新入眼可憑雲鳥問
山靈

陳情答史使君

十年側注媿浮名中夜行吟感慨生已覺衆賓

疎翟尉還將百口累周卿窮來欲作孤兒語難
後溪縣國士情久沐恩波何以報鮫人空有泪
從橫

送俞山人公臨

平生結客少年場送爾踟躕大道傍彈鋏歌殘
遷幸舍登樓賦就總它鄉論心江海愁相失搔
首乾坤意轉長見說故園歸未得姑蘇芳草斷
人腸

答歐楨伯博士

尺素南來慰所期敢從雙鯉問何遲傳將國子
先生解絕勝曹娥幼婦辭欲報居然慚縞帶相
思真不異瓊枝太玄已就千秋業多士如雲識
者誰

寄黎惟敬秘書兼訊長君伯華

三朝出入見恩私高閣藜然五夜遲請沐不談
溫室樹侍中曾和栢梁詩自甘南省爲郎老客
難東方執戟疲聞有一毛成五采知君原在鳳
皇池

公臨別之姑孰客于龍使君賦寄

憶君同倚謝公樓江上浮雲極目愁酒設平原
曾十日書藏小酉自千秋各天風雨悲神劒永
夜星河帶客舟見說青山堪卜隱儘教辭賦爲
依劉

九月八日城東樓晚眺寄史使君姑孰

落葉來鴻秋可憐孤城晚眺正蒼然向傳李白
題詩處重見玄暉在郡年霜後鳴砧千戶月風
前哀篴一江煙倚闌却憶龍山會誰共黃花插

酒邊

閣夜餞客

天涯把手慰飄零，寒色高樓入杳冥。
握裏明珠堪代月，座中聯璧總成星。
片心玄後從嘲白，雙眼狂來始見青。
南北路岐今夜酒，問君那可獨爲醒。

於閣宴重送客游梁

尊酒重携賦遠游，北風吹雨散高樓。
少年肝膽親雄劍，久客冰霜戀敝裘。
地劃河流疏碧漢，天

開嶽色壯清秋由來照藥稱梁國縱是明珠莫
易投

送孝廉沈師會殯還越先人嘗出守是郡
因貽越父老

越水吳山雁到稀那知此會對沾衣風前千里
生芻薦雪後孤城落葉飛伏櫪暮年心尚壯及
門經術事多違歸逢五馬行春地棠樹青青定
幾圍

哭王九江維禎二首左宜人先公六日

海內才名北斗縣千秋日月照遺編翻疑此道
終歸夜共嘆斯文欲問天托乘羣龍元異種吹
簫雙鳳並游仙招魂楚些今休賦緱嶺王家事
可傳

其二

春風携酒幙溪濱一別懷人隔暮曛胡意龍蛇
真應識亦知鸞雀自爲羣浮雲幻世誰非客明
月窺庭或是君何必山陽能感舊只今隣笛豈
堪聞

寄吳兵憲道南上谷吳先守兵部郎

使節飛揚塞日低，胡笳吹徹陣雲迷。
蛇含夜冷雙龍嘯，首宿春晴萬馬嘶。
漢署籌邊傳上策，燕山勒石見新題。
棄繻年少元吾志，一顧恩堪國士齊。

其二

霜威先度媯川波，傳檄呼韓款塞和。
坐喜妖氛銷太白，行看兵甲洗天河。
雄詞七子東阿盛，魏子有飛將千秋上谷多。
漢李廣嘗鎮上谷憶爾親裁檄，

吹曲帳前停奏舊饒歌

黎惟敬秘書朱秉器渝州同日書至

渝州遠將

月俸秘書以手跡見貽

清朝諸俊雅能文兩地征鴻一夕聞
荒徼西看流白日長安北望起浮雲
囊因羞澁傳金錯書自從橫得練裙
正值楚天搖落候登臨何處不思君

和身之登北樓作

使君雙眼借山娛猶憶風流臥治蘇
四牡馳驅

逢日暇一樓危絕賴雲扶江搖萬井寒光動月
滿千林夜醉呼我欲飛從高處賦白龍早晚到
還無

答朱憲使潼關

秦中百二控重關表裏黃河太華山絕塞傳書
芳草後清秋乘障白雲間三危露滿仙人掌十
丈花明玉女顏此地真源應可問茅龍借得渡
江還

城東臥病答君典

伏枕俄經十日秋高車無夕不淹留自緣異姓
爲兄弟誰信孤城各斗牛天闊河流光欲澹地
遙江樹影疑浮怪君獨擁文君臥也學相如雅
倦游

季豹過東莊宿憶弟蕃台先夜之約

舊徑蕭條一騎通柴門秋色近江楓酒杯隔夜
懷今雨耕鑿當年見古風蟲語催寒供伏枕蟾
光分照對縣弓因君更作西堂夢芳草愁看白
露中

青山尋謝宣城故宅

不妨微雨繫孤槎
且向青山問謝家
三徑春風歸燕雀
一江秋水上蘼葭
夢中渴憶如瓊樹
句裏長飛似綺霞
故郡可憐祠廟在
臨流吾欲采蘋花

姑孰留寄史仲弢司理

斜日孤城水上浮
浪游誰問孝廉舟
南來碧樹初搖落
北向滄江正穩流
客裏夜懷姑孰雨
望中雲色秣陵秋
前程一倍思君處
獨醉西風太

白樓

玄武湖逢劉大理長欽留集齋頭

玄湖秋水掖池通
馬上逢君出漢宮
鐘阜望高王者氣
蕭齋坐見古人風
名收結襪傳廷尉
賦就披襟讓國工
莫怪當筵能盡醉
步兵今日在江東

十三夜宴沈徵甫文選署閣

時令公子在座

漢京樓閣倚秋空
出沐清尊畫省同
六代文章推沈約
中朝啓事說山公
白門柳色寒依席
長

樂鐘聲晚出宮日下只今鵲鷺滿也須天外着
冥鴻

其二

相看入夜醉仍呼自是高陽舊酒徒目極青天
飛破鏡掌擎滄海出明珠星垂潁里光堪映秋
滿胡牀興不孤莫問何曹君近領但疑身在步
兵厨

姑熟郭望蕪湖寄龍使君

繞郡江流匹練長憶君東望迥蒼蒼但隨鷗鳥

停孤櫂只隔薜蘿作兩鄉吹斷旅魂來畫角歌
成古調屬清商不須論到平原會三載何能奉
一觴

過太常許公仲貽感呈一首

秋高斗酒別秦淮居起逢人問轉佳許椽健遊
饒勝具太常頻醉罷清齋長瞻北斗雲霄近久
分南溟羽翼垂舊里高陽星更聚難將陳御向
君偕

得李符卿書

都市逢人問李邕書來猶遣白雲封久於方外
稱司馬共向廬中識臥龍岱嶽天高收沆瀣楚
江秋冷采芙蓉所思遠道何由寄東望翩然欲
往從

同任山父恩上人登報恩寺塔

孤塔靈光夜夜開招提高聳帝城隈錫隨法
鴈從空度鉢起降龍挾雨回雙闕雲文施錦繡
六朝秋色照樓臺釣鼇好問任公子東望扶桑
海一杯

鹿裘石室集卷第十六

終

鹿裘石室集卷第十七

宣城梅鼎祚禹金著

詩

七言律

保豐臺憶寒龍二使君

高臺四面接清暉二月光風上客衣遙憶故人
成遠眺真教游子憺忘歸山城宿雨雲陰合水
國生寒柳色微知爾宦情今更薄江湖無地着
漁磯

歐楨伯書至將自免歸嶺南取道宛上

羅浮處處憶游蹤虛有聲名徹九重歌勸春殘
燕谷黍夢歸秋冷未央鐘五千或可傳關尹六
百相將免曼容可說歐家曾善鑄匣中閒殺舊
芙蓉

哭徐子與方伯

先是寄詩有
夢蝶之語

合向清朝領搢紳回翔終滯一藩臣幻身早悟
蒙莊蝶絕筆初驚魯國麟九疊雲低扶旅櫬五
湖春老屬何人因君脫劍愁無地一掬寒漿灑

白蘋

月夜周國雍吏部席上得名字

朝來鳴佩散瑤京斗酒新豐卜夜傾陸令自憐
游洛晚周侯今得過江名仙臺露掌高秋色御
苑寒砧動月明萬里銀河應有路臨空真切況
槎情

傷胡懋禮太史

有序

太史在梁藩日致書及三詩神交于僕僕未
之報也未幾而訃聞今秋薄游京邑寔太史

之鄉益盡然傷之焉

當年分省憶游梁
雙鯉黃河路淼茫
懶報久成中散癖
忘年不記禰生狂
清秋擬托生芻薦
坏土傳聞宿草長
畱滯周南傷太史
東封誰更扈
今呈

奉懷前中丞銅梁張公嘗入爲大光祿近
起家撫關中

向來三輔獨登壇
幕府清尊許整驩
侍衛稍移玄武仗
入關重賜惠文冠
白門楊柳歌中暮
大

華蓮花掌上寒不信感恩心未死剖將一寸寄
君看

子及思善二方郎先謫出京余詩懷之

漢宮題柱競光輝名姓翻令謫籍歸一別秦淮
吟社冷到來燕市酒人非千門落月歌鐘起萬
壑清霜木葉飛秋色江南看漸老欲題書札雁
鴻稀

長干恩上人房遇任山父別駕自滇使入
京因憶朱憲使秉器陳永寧思貞姚嘉

定敘卿張山人維守

歸途萬里乍逢余
帝苑秋驚木落初
剖得江魚書不減
到來梁月夢成虛
東林暫借高僧榻
南徼仍題別駕輿
回首青谿三弄笛
十年容易髣髴毛疎

靈谷寺憶前游

尚憶招提漢寢傍
重來歇馬午鐘長
千秋紫氣高龍阜
九月清霜閤雁堂
歲久松聲濤漸壯
雨殘榭葉徑全荒
輸他羣鹿皈依念
日日銜花禮

法王

南歸出都亭留別劉長欽陳克嘉大理沈
徵甫周國雍文選顧道行司勳郭相奎
水部劉公恒刑曹

尊前寒日靄餘暉相送離亭落葉飛宛洛名賢
冠帶集京都游俠布衣歸平生七首行堪仗幾
度刀頭約已非白鷺洲邊千里月流光先到舊
漁磯

送吳別乘赴合浦

南越孤城大海濱山川百戰氣含辛瘡痍未起
須勤撫豺虎仍驕不易馴千秋傳漢將題
輿萬里作波臣試看合浦能飛葉知爾懸心在
紫宸

庚辰人日季豹家集諸子

招要杯酒屬茲辰座上初馮綵勝親好與芳春
閒作主且分愁日彊隨人樓臺雪後殊增色梅
柳風前各吐神便買扁舟武陵去桃花新水漸
鱗鱗

早春蒲上寄劉公謨兼呈明府先輩

向來綠竹醉高樓一臥空山似隔秋縱說吾家
追阮謝可教辭客失應劉溯波尺鯉勞傳字出
谷新鶯轉喚愁見說春來彭澤宰巾車還命敬
亭遊

吳門魏季朗淞江莫雲卿新都汪子建仲
淹仲章謝少廉程子虛吳夢竹秣陵舊
游也間者濶焉憶之

翩翩意氣動西京曾約長干寺裏行岐路十年

餘病骨中原八子擅材名浮雲破夢青山遠落
日懷人白雁驚轉恨各天消息斷孤城鳴角一
霑纓

李符卿書再至

不厭昭亭是李侯逢人雙札問前游輸心泉石
終投老屈指參辰動隔秋霜盡斷鴻遙繫夢月
明驚鵲自關愁風烟極目天南北歲晚空江獨
倚樓

張大來王美中兄弟過集

相逢俱在畏途間，且判高歌蹙解顏。
把酒千門來朔氣，登樓雙眼受青山。
但停車轍人爭識，每過蓬蒿意自閒。
醉後莫愁歸路晚，待邀明月送君還。

送張侍御赴嶺南兵備

向來驄馬獨翩翩，綠鬣青雲侍從年。
帝遣張騫持漢節，衆傳楊僕將樓船。
陣開魚麗看橫海，劍字龍泉欲倚天。
知爾功成銘自勒，羅浮端不讓燕然。

汪子建山人自吳門過訪予時初免服而

汪持服

長干一別幾經秋江上停橈問舊游但說斑衣
俱墮淚相看華髮總關愁俠心久徬要離塚詩
興還高謝眺樓縱是平原非此會也須十日爲
淹留

寄劉長欽大理

玄武湖邊列署閒鳳城春滿五雲間共嘲楊子
淹持戟自信劉伶善閉關顏色夢回梁上月交

遊心托杖頭山敬亭又見梅花落憶爾虛勞驛
使還

寄沈徵父文選

少年場裏放歌豪長揖都亭解佩刀別去風流
時想像病來春興日蕭騷東南王氣開雙闕侍
從清名冠六曹嬾慢不堪君自識何勞書札絕
山濤

寄顧道行司勳

美酒新詩意氣看逢君一諾不爲難分曹獨妙

題才術微祿還能結客驩淮水流澌春欲曉蔣
陵芳草雨將殘常懷寶石岡頭寺曾以清齋對
宰官

寄周國雍司封

平原公子美遨遊京洛風煙屬暮秋隔歲素書
稀遠道于時畫省盡名流鏡中楊柳春全得笛
裏梅花晚獨愁拋却周郎誰顧曲半生清淚滴
箜篌

聞龍河南左遷楚中別駕

庚辰
年

五年初見畫熊新更說題輿信漸真似與黃楊
同厄閨轉憐芳草獨逢春圖中索駿名空在衆
裏揚蛾妒有因猶幸主恩寬放逐莫將辭賦
弔靈均

送叔箕朝白嶽屬 詔有前星之禱

爲言人世有蓬萊昔我曾攀嶽色來帝闕差我
清路直天門詆蕩白雲開經春寒逗陰崕雪當
晝晴奔絕壑雷爾去祠官初擁節好從稽首祝
高禱

兩悶懷李豹示諸兄弟

春色蕭蕭傷髣流中宵風雨不能休雷驚盡起
龍蛇蟄歲往空懸犬馬憂謝客地偏常伏枕懷
人天遠一登樓知他芳草王孫路可向西堂夢
裏游

送李郡丞解官還蘄水

佐郡翩翩迴不羣政成美譽更多文賦來鸚鵡
容狂士詠就甘棠憶使君白社難拋彭澤酒青
蓮也厭敬亭雲故園春色知無恙啼鳩從先百

章聞

其二

不分浮名損壯顏
興來投劾乞身閒
便招黃鶴同歸楚
又見青牛獨出關
末路何心投主壁
後期誰望賜臣環
明時君更翔千仞
指點城東

說鳳山

新水城東
有鳳棲山

送史仲弢使君應召北上六首

看君乘傳有光輝
漢寵新承入禁闈
侍從諸臣思補袞
太平天子坐垂衣
未央秋漏兼星

曙長樂寒鐘帶雨飛莫謂青雲能薦達江湖也
用著漁磯

其二

尺五城南世業新當庭玉樹故嶙峋爲渠傳復
登循吏如矢家原有直臣燕地向聞高市駿
聖朝端合重批鱗況逢魚水相歡日環珮聲中
燕鎬春

其三

北樓高倚謝公城暇日登臨若遠行每念青蓮

爲異代自操白雪少同聲當尊疊嶂攏雲起俯
檻澄江曳練明君到上林花鳥地可能南望不
關情

其四

先朝七子竝辭流碣石真同鄴下游此後齊盟
誰狎主只今清譽爾先收吹成鄒律回春早和
罷燕歌變徵秋一別朱絃吾自老敢輕山水向
人投

其五

白眼縱橫俠氣龐年來多難薄爲儒諾逢季布
生堪托交有山濤歟不孤一借國工明抱壁終
慙海客泣償珠從知折節君能事好向燕中問
狗屠

其六

市隱蕭條一徑斜問奇長過子雲家尊中十日
如澠酒閣外孤城似綺霞散帙清風生薜荔倚
歌明月浸蕪葭它年儻授元戎節小隊南來覓
浣花

寄蹇使君督學山東

豈令才子歎飄蓬
憲府遙臨海岱雄
自領衣裳青帝社
合張絲竹素王宮
扶桑煜煜先占日
大國泱泱屬采風
稷下諸生休騁辯
使君經術起河東

送萬明府赴南安郡丞

政成桃李靜年芳
花裏鳴琴白晝長
纔見雙鳬離葉縣
又分五馬出陵陽
津亭暮柳臨風嫋
庾嶺寒梅帶雪光
腰下大夫章早佩
知君辭賦已

登場

送外舅唐公由江藩入賀初爲吏部郎其
叅知大梁亦有是役

使者西來謁建章漢宮重進紫霞觴雲開玉筍
僊符見日轉金樞帝籙長後儁十年歸水鏡
分藩兩地誦甘棠看君近作匡廬長手捧香爐
對御牀

送顯生武舉北上

虬髯猿臂佩雕弧六郡良家應一呼每飯帝

難忘鉅鹿頻年虜稍遁飛狐北來七首酣燕酒
西去關頭弃漢繻金印斗縣恩不細御前生致
五單于

馮開之太史過宣城訪予天逸閣

拍浮暫乞五湖身詔許僊班散玉宸自愛青

山尋謝客遙占紫氣度真人天迴牛斗雙龍合
地闊鴻濛萬象新知爾舊然藜杖在餘光高閣
照嶙峋

秋日臥病山中示季豹諸子

伏枕空山歲月遙中人寒氣日蕭蕭隔牕暮雨
吹楓葉曲徑秋雲長藥苗狂至一身成骯髒愁
來孤夢易飄搖莫誇爾輩工辭賦楚客離魂未
可招

寄張伯起

五湖未老愛閒身一葉蓮舟一釣綸共說鵬搏
聊暫息豈知龍性本難馴九歌蘭芷思公子十
月梅花寄遠人不是君家兄弟在吳閫何地著
陽春

答張幼于

只今無路拜君堂，曾擬交情託范張。
謝朓樓頭江似練，吳王臺上月如霜。
懷中不滅三年字，眼底底空期十日觴。
惟道龍光難自閼，遙知舊里是干將。

赭山卽席答于湖子弟

把酒千峰半夕陽，遙天西望白雲長。
王孫蹋盡江南草，趙女彈來陌上桑。
雙佩投人明月浦，千金結客少年場。
波平似鏡蟾初照，借與蛾眉鬪。

晚妝

月夜江上爲于湖子弟送顧八還金陵教

坊

楚雨巫雲夢裏過一時年少淚痕多
搖搖小艫青絲紉嫋嫋長筵白苧歌
還憶後庭攀玉樹相憐此地挹金波
空勞別酒江爲釀半醉朱顏已覺酡

承吳比部伯與人日書將使入關

流澌南下大江千萬里雙魚到不難
燕谷王春

初應律幽州人日尚餘寒親承漢節西曹出遙
指秦城北斗看玉井蓮花君杖底定將名字刻
琅玕

寄送吳員外卹刑秦中暫覲汝上兼問潼
關朱使君

攀柳都門物候新翩翩使者指青春停車子舍
還休汝解網皇恩好借秦銅爵鳴風高石闕
金雞銜日下楓宸只今尹喜稱關令爲爾先占
紫氣頻

早春寄史郎闕下

侍從初看得意年東風雙珮引娟娟
僊郎白雪裁新調天子青陽敞御筵
太液波聲寒宿雨建章草色暖霏煙
江南春好君應憶日送歸鴻向日邊

寄山中兄弟

不分經時尺素稀故園山水有清暉
知無別遠猶勞夢縱是登高未當歸
入手酒杯殊自厭驚心花片報初飛
向來似定連牀約轉聽中宵舊

雨非

寄張郡丞京口

海門東控 帝王州鎖鑰真堪寄
上頭臥見兩岐歌歲穰坐携孤劍
畫江流蒜山雨過花明郭
瓜步潮來月滿樓共道君如張博望
金焦雙擁一槎遊

題海防丘郡丞眞州樓

鈴閣深沈號令寬倚闌長嘯白雲端
地當鎖鑰收全勢天與東南表壯觀
波靜魚龍杯底伏陣

閒鵝鸛鏡中看挂弓知爾平生志矯首扶桑海
色寒

寄劉公恒比部時聽徙還青州其先在南
都嘗以酒助予遊

謫居遙寄海東頭回首長安憶舊遊一自仙郎
逢畫省曾教從事出青州十年不調何遲暮千
里傳書又隔秋媿我飄零爲客久只今無計可
依劉

寄郭相奎潮州

連年兵火接炎洲南顧深懸 聖主憂截海曾
看諸將出分符今壯使君遊機絲夜織鮫宮冷
樓閣晴生蜃氣秋治行卽看高五嶺不勞重說
郭并州

秋日得唐外舅西粵書因感蕪江之別

憲府春來歸興濃秋風萬里滯行蹤書傳白雁
霜何早歲度蒼梧瘴幾重嶺越地通勞漢使西
南天盡見堯封所思湘水深難往夢斷蕪江郭
外鐘

寄陳德基吳郡海防

初令休寧
自嘉興遷

十年宦轍總窮途也見腰章佩大夫白嶽初司
臨北時繡江移鎮向東吳樓船截海聯鵝鸛賓
客當筵半釣屠能賦自來推獨步登高那不上
姑蘇

旌川訪周侍御話舊

紫山東郭夕陽斜來訪西臺御史家簪筆先朝
依日月拂衣蚤歲乞烟霞座中風景差無恙鏡
裏霜華漸欲加五度春光輕一擲更逢流水泛

桃花

龍君揚僉憲以五開之捷進秩

詔開憲府百蠻天繡斧霜威淨瘴煙全楚舊封
京觀地三苗重格兩階年青林風靜聞嘶馬赤
水雲蒸望跼鳶吹笛袁生今在郡懷人遙和武
陵篇

其二

文武聲名起 聖朝恠來都道阿龍超如林士
奮中黃勇入月星摧太白妖三殿 璽書天北

月
三
一
極千秋銅柱日南標創痍未起須勤撫尚恐殤
魂不易招

史職方仲弢犒師雲中

前星光耀紫微宮湛露承恩萬國同少府金錢
頒塞外仙郎玉節下雲中臨關霜色飛狐滿按
部秋聲戰馬雄召對懸知明魏尚 君王神武
重邊功

寄周順慶國雍

一從千騎上頭居相望東西萬里餘巴子城高

應下鳳嘉陵江遠不通魚醺人麴米春堪憶對
客梅花凍欲舒自昔知君能薦士蜀中辭賦有
相如

早春登疊嶂樓簡黃使君

登樓疊嶂倚寒暉城郭多年在翠微二月流澌
春澹澹千家芳草曉菲菲雪殘歸鴈衝風起江
霽長虹夾水飛因憶謝公爲郡後一時文雅似
君稀

夏大水簡郡中

唐荊石先生集卷之十七
萬頃煙濤接混茫孤城猶聽雨浪浪望洋我自
憐河伯裹飯誰能問子桑野哭似聞成陸海君
恩倘許發淮陽高齋坐嘯真仙吏江樹雲中辨
幾行

姑孰逢皖郡王旭東司理余從陸之金陵
法星昨夜已臨關客裏相逢一解顏覓醉且爲
維雀舫登高先自問龍山霜稀原草寒仍秀風
靜江雲晚更閒秋好惜君輕作別馬頭東去月
如環

送劉長欽僉憲兵備滇南

五尺西南道漸荒
看君六傳自飛揚
桐師烽急蒲蠻壘
竹使符開箐瘴鄉
黑水舊經通禹貢
畫圖新譜鎮夷方
由來王者稱無外
直度瀾滄表漢疆

方子及比部署同周文美汪仲嘉謝少廉
程子虛何公露李豹泰符夜集感舊

南都賓從尚追隨
西署風華每繫思
再入承明才地迥
更臨玄武勝流宜
飛灰六琯生陽早
殘

雪千門照夜遲舊社多從萍梗散對君猶一接
瓊枝

至後過歐楨伯水部時乞歸不允

隔江屢枉尺書裁兩槩來尋一醉回擬別白門
攀御柳還逢東閣看官梅賦添積雪多懷海客
候占雲偶上臺未許文園稱病去孝陵蔥鬱
氣佳哉

張中郎署集先大夫督學門士時上計便
過濱州

寒曉蓬萊散玉珂清尊卜夜好相過郎潛粉署
江湖在客久鍾山雨雪多卽有程書優北計還
從授業問西河到家暫集高臺讌岱色青連渤海波

夜飲許伯倫故太常公第

石城城上半烏棲美酒邀停碧玉蹄每憶許詢
瞻朗月向知江令住青谿妝明銀燭光爭雪襟
解羅襦醉似泥便欲留驩過臘盡春風吹柳惜
分携

人日答呂玉繩使君

玉樹清標少俊身，公孫名德托交親。
雲霄僊籍初登吏，風日王正喜趁人。
凍草未消吳苑雪，綵花曾翦漢宮春。
湖山飛蓋憑留賞，處處陽和氣象新。

入吳寄蹇觀察先是義興有陽侯之厄

東下扁舟信所如，遙瞻開府上頭居。
千金已悞垂堂戒，一水先傳破塚書。
藥裹他鄉留病客，梅花隔歲眇愁予。
香杭正熟鱸登市，風味江南十

月初

荅傅吳縣伯俊

吳江楓冷興蕭疎頻枉干旄問索居遵渚似教
隨旅鴈過河無意泣枯魚煙霞舊里尋仙尉風
雨孤城卧闔閭政暇傳君多藻詠山川能使宦
情疎

送王敬美督學閩中

公輔才稱奕世長黑頭高卧閱滄桑起家東粵
傳經使侍 帝中朝尚璽郎綵筆曾憑金掌動

絳紗今接幔亭張定教雙劍延津出龍氣遙瞻
北斗傍

其二

經年三殿璽書臨應世何妨出世心按部獨持
滄海節驅車猶戀白雲吟文占南國干星象歲
隱東方舊陸沈共道上林誇羽獵知君扈從
主恩深

其三

清時伯仲大名垂蹤跡浮沈且莫疑豈必王家

俱誓墓爭傳郢曲和吹簫春風閩嶠褰帷徧臘
月吳江進艇遲君自神仙重作吏武夷猶得領
真祠

其四

衣冠出祖向河壩滾滾從知不乏賢千里喜同
元禮棹一時勞覓孝廉船候關真氣仍留紫侍
坐何人解守玄虛有管絃催別酒后堂那易到
彭宣

吳門送顧明卿之廣州提舉

粵先有兵事
顧嘗以使登

廬

十年三徙近南溟積雪凝波海著靈嶺表樓船
歸幾道漢家鹽筴議盈庭羅浮丹藥顏常赭廬
阜藍輿眼舊青送客吳閶春色早濠南新柳拂
官亭

馮元成學憲示西征集

黔中形勝隔風煙萬里駢駢叱馭前漢使鑿空
窮亥步省郎持憲在丁年六經懸日能開夜多
士披雲欲睹天舊賦西征虛麗藻何如化俗異

方傳

畚贈中府臨淮李侯

中朝七葉珥貂行世表岐陽異姓王十二羽林
親宿衛三千珠履盡登堂撫夷諸校踰蔥嶺侍
帝新詩和栢梁自笑子雲工筆札歌鐘難醉五
侯傍

秋浦余聿雲逢予金陵一再同過湯義仍
太常別去寄所撰談隱及早春見懷之
作依韻荅一首時池皖間有兵事而余

居嘗好彎弧鳴劒笑及之

帝京花月許平分洛下才名衆所聞曾醉太常
齋罷酒更傳九子洞中文逢春遠道行芳續如
日臨江赤羽紛爲說西征多幕客一時飛檄盡
輸君

張伯起以詩見報倚韵却寄于時有京口
之警

千里緘書謝眺城側身東望四愁生玉盤忽漫
勞相報石鼓何由得自鳴少日聲華空屈指中

年憂樂總關情姑蘇預恐遊麋鹿海上傳聞漸
甲兵

鹿裘石室集卷第十七 終